

ESTATUTOS

CAPÍTULO I DA ASOCIACIÓN EN XERAL

Artigo 1º.- 1.- Constitúese unha asociación sen ánimo de lucro das previstas na Lei orgánica 1/2002, do 22 de marzo, reguladora do dereito de asociación. A asociación ten a seguinte denominación "ASOCIACIÓN/OBSERVATORIO DA MARIÑA POLA IGUALDADE"

2.- A asociación rexérase polos ditos estatutos, pola Lei orgánica 1/2002, do 22 de marzo e pola demais lexislación existente en materia de asociacións que lle sexa aplicable.

Artigo 2º.- O domicilio principal e permanente da asociación radicará na localidade de Ribadeo rúa Avenida Rosalía de Castro 10-3º-N- nº, C.P. 27.700 teléfono 650.96.04.85, correo electrónico observatorioigualdade@yahoo.es

Artigo 3º.- A asociación, en funcións dos seus fins e do emprazamento do seu domicilio social, exercerá fundamentalmente as súas actividades no ámbito territorial da comarca da Mariña, e tendo un ámbito provincial.

Artigo 4º.- 1.-A asociación constitúese por tempo indefinido e só se disolverá, conforme a estes estatutos, pola vontade das asociadas expresada en Asemblea Xeral Extraordinaria ou polas causas previstas na lexislación vixente.

2.- A asociación rexérase segundo os principios democráticos contidos no marco da Constitución e o resto do ordenamento xurídico.

Artigo 5º.- 1.- Son fins principais da asociación:

a.- Promover a igualdade de oportunidades entre mulleres e homes en todos os ámbitos.

b.- Fomentar a toma de conciencia sobre a actual situación de "discriminación contra a muller", entendida como toda distinción, exclusión ou restricción baseada no sexo que teña por obxeto ou por resultado menoscabar ou anular o recoñecemento, goce ou exercicio para a muller, independentemente do seu estado civil, sobre a base da igualdade

do home e da muller, dos Dereitos Humanos e as liberdades fundamentais nas esferas política, económica, social, cultural e civil ou en calquera outra esfera.

c.- Constituir un foro de intercambio e comunicación entre órganos públicos e o movemento asociativo de mulleres.

d.- Fomentar a participación das mulleres na vida social e cultural, e impulsar canles de comunicación entre as asociacións de mulleres.

2.- Para levar a cabo os seus fins, poderá a asociación organiza-las seguintes actividades:

a.- Propór a realización de estudos e informes técnicos de diagnose da situación das mulleres na Comarca da Mariña.

b.- Realizar un seguimento informativo de políticas sociais que afectan ás mulleres.

c.- Recadar e transmitir información sobre medidas e actividades que poñan en marcha as Administracións Públicas en materia de igualdade de oportunidades.

d.- Realizar campañas de sensibilización co fin de promover a igualdade das mulleres en todos os ámbitos.

e.- Elaboración e canalización de propostas concretas tendentes a acadar unha maior participación activa das mulleres nos centros de decisión.

Os beneficios que se obteñan por calquera concepto destinaranse exclusivamente ó cumprimento destes fins, sen que se poidan repartir entre as asociadas nin outras persoas físicas ou xurídicas con interese lucrativo.

CAPÍTULO II DAS ASOCIADAS

Artigo 6º.- 1- Poderán ser integrantes da asociación todas aquelas persoas físicas, con plena capacidade de obrar e as persoas xurídicas, tralo acordo do seu órgano competente, que non teñan débedas pendentes coa asociación e que reúnan os seguintes requisitos:

a. Aceptar os fins establecidos no artigo 5 dos presentes Estatutos.

b. Aceptar e cumprir os requisitos establecidos nos Estatutos.

c. Aboar a cota establecida pola Xunta Directiva.

2.- As persoas físicas deberán ser maiores de idade ou menores emancipados con plena capacidade de obrar e non estar suxetas a ningunha condición legal para o exercicio do dereito.

3.- Os acordos de admisión de asociadas tomaraos a Xunta Directiva, unha vez recibida a petición por escrito da persoa que desexa ser admitida.

Artigo 7º.- Dentro da asociación poderán existirlas seguintes clases de asociadas:

- a) Fundadoras, aquelas persoas que subscribiron a acta fundacional.
- b) Numerarias, aquelas persoas que ingresaron con posterioridade á subscripción da acta fundacional.
- c) Honorarias, aquelas persoas que, a xuízo da Asemblea Xeral, axuden de xeito notable ó desenvolvemento dos fins da asociación.

Artigo 8º.- 1.- A condición de asociada pérdese:

1. Por vontade propia.
2. Por falta de pagamento de 4 cotas.
3. Por incumprimento das súas obrigas ou a realización de accións que prexudiquen gravemente os intereses da asociación, logo do expediente disciplinario, con audiencia do interesado.
4. Por falecemento da persoa física ou extinción da persoa xurídica.

2.- A expulsión de asociadas nos supostos dos apartados b) e c) do parágrafo anterior, será acordada pola Xunta Directiva, logo da audiencia da interesada. O acordo de expulsión deberá ser ratificado pola Asemblea Xeral Extraordinaria e contra a súa resolución poderá ser recorrente ante a xurisdición ordinaria.

Artigo 9º.- As asociadas teñen os seguintes dereitos:

1. Participar nas actividades da asociación e nos órganos de goberno e representación, exercer-lo dereito de voto, así como asistir á Asemblea Xeral, de acordo cos estatutos.
2. Ser informada da composición dos órganos de goberno e representación da asociación, do seu estado de contas e do desenvolvemento da súa actividade.
3. Ser oída con carácter previo á adopción de medidas disciplinarias contra ela e ser informada dos feitos que dean lugar ás ditas medidas, debendo motivarse o acordo que, no seu caso, imponha a sanción.
4. Impugnar os acordos dos órganos da asociación que estime contrarios á lei ou ós estatutos.

As asociadas honorarias non intervirán na dirección da asociación nin nos órganos de representación desta, pero están facultadas para asistir ás asembleas xerais con voz, pero sen voto.

Artigo 10º.- Son obrigas das asociadas:

1. Comparti-las finalidades da asociación e colaborar para a súa consecución.
2. Paga-las cotas que se establezan.
3. Desempeña-los cargos para os que foron elixidos.
4. Acatar e cumpri-los acordos validamente adoptados polos órganos de goberno e representación da asociación.
5. Acata-lo contido dos estatutos.
6. Ter unha boa conducta individual e cívica.

CAPÍTULO III DOS ÓRGANOS DA ASOCIACIÓN

Artigo 11º.- A dirección e administración da asociación serán exercidas pola persoa que ostente a Presidencia, a Xunta Directiva e a Asemblea Xeral.

Artigo 12º.

- 1.- A **presidenta** da asociación será designada pola Asemblea Xeral entre as asociadas e o seu mandato durará 2 anos. Será asistida nas súas funcións por unha vicepresidente, que a substituirá nos casos de vacante, ausencia ou enfermidade.
- 2.- A presidenta terá as seguintes atribucións:
 - a) Representa-la asociación perante calquera organismo público ou privado.
 - b) Convocar e presidi-las sesións que celebre a Xunta Directiva; presidi-las sesións da Asemblea Xeral; dirixi-las deliberacións dunha e outra, e decidir con voto de calidade, no caso de empate.
 - c) Executa-los acordos adoptados pola Xunta Directiva e a Asemblea Xeral.
 - d) Ordena-los pagamentos acordados validamente.
 - e) Asina-las actas, certificados, pagamentos e outros documentos da asociación xunto co secretario ou membro da Xunta Directiva a quen lle corresponda a elaboración do documento de que se trate.

Artigo 13º.

- 1.- A **Xunta Directiva** estará formada pola presidenta da asociación, unha vicepresidente, unha secretaria, unha tesoureira e. duas vocais.

2.- Os cargos que compoñen a Xunta Directiva serán desempeñados de forma gratuíta, sen prexuízo do dereito a ser reembolsados dos gastos debidamente xustificadas en que poidan incurrir por actuacións relacionadas coa asociación. As persoas elixidas para estes cargos deberán carecer de interese económico nos resultados da actividade levada a cabo pola asociación.

3.- A Asemblea Xeral será a competente para elixi-los cargos da Xunta Directiva. A súa duración será por un período de 2 anos, aínda que poden ser obxecto de reelección indefinidamente.

4.- Os cargos cesarán na súa función por:

a) facelemento da persoa física ou extinción da persoa xurídica.

b) renuncia voluntaria.

c) transcurso do prazo para o que foron elixidos.

d) acordo de cesamento de toda a Xunta Directiva adoptado por $\frac{3}{4}$ dos asociados reunidos en Asemblea Xeral extraordinaria convocada para tal efecto. A renuncia e o transcurso do prazo non dan lugar ó cesamento automático, senón que se deberá facer un efectivo traspaso de poderes con entrega de documentación e posta ó día do sucesor.

As vacantes que se puideran producir durante o mandato de calquera dos membros da Xunta Directiva, serán cubertas provisoriamente entre os ditos membros ata a elección definitiva pola Asemblea Xeral. En calquera caso, a Xunta Directiva debe estar integrada como mínimo por 3 persoas, que exercerán as funcións de presidenta, secretaria e tesoureira.

Artigo 14°.- A Xunta Directiva terá as seguintes atribucións:

1. Programar e dirixi-las actividades asociativas.
2. Leva-la xestión administrativa e económica da asociación.
3. Someter á aprobación da Asemblea Xeral o orzamento anual de ingresos e gastos, así como o estado de contas do ano anterior.
4. Convocar e fixa-la data da Asemblea Xeral.
5. Propoñerlle á Asemblea Xeral a fixación de cotas ordinarias e extraordinarias para os asociados.
6. Designa-las comisións de traballo ou seccións que se estimen oportunas para o bo funcionamento da asociación.
7. Ditar normas interiores de organización e exercer cantas funcións non estean expresamente asignadas á Asemblea Xeral.
8. Resolver sobre as solicitudes de ingreso de novos asociados.
9. Propoñe-lo plan de actividades da asociación á Asemblea Xeral para a súa aprobación, impulsando e dirixindo as súas tarefas.
10. Resolve-los procedementos disciplinarios que se instrúan.

11. Aquelas que non veñan atribuídas expresamente á outro órgano da asociación.

Artigo 15º.

1.- A Xunta Directiva será convocada pola presidenta, a iniciativa propia ou a petición de calquera dos seus compoñentes.

2.- Para que os acordos da Xunta Directiva sexan válidos, deberán ser adoptados pola maioría de votos das asistentes, sendo necesaria a concurrencia, polo menos, da metade máis un dos seus membros e, en todo caso, da presidenta ou vicepresidenta e a secretaria ou persoa que o substitúa.

A secretaria ou, no seu defecto, a vocal que a substitúa, levantará acta das sesións, que se transcribirá ó libro de actas.

Artigo 16º.- Os membros da Xunta Directiva presidirán as comisións que a propia Xunta acorde constituír, co fin de delegar nelas a preparación de determinados actos ou actividades, ou de acadar delas as informacións necesarias. Formarán parte das ditas comisións o número de asociadas que acorde a Xunta Directiva, a proposta dos seus respectivos presidentes.

Artigo 17º.- A **Asemblea Xeral** de asociadas é o órgano de expresión da vontade da asociación e estará formada por tódas as integrantes desta. A presidenta e a secretaria da asemblea serán a presidenta e a secretaria da Xunta Directiva.

Artigo 18º.- A Asemblea Xeral reunirse con carácter ordinario como mínimo unha vez ó ano, e con carácter extraordinario cantas veces o acorde a Xunta Directiva, ou o soliciten o 10% das socias. Neste último caso realizárase por medio de escrito dirixido á presidenta, autorizado coas sinaturas das solicitantes, no que se expoña o motivo da convocatoria e a orde do día.

Artigo 19º.- A Asemblea Xeral Ordinaria reunirse necesariamente no período que vai desde o mes de setembro ata o de xullo. Tanto a Asemblea Ordinaria como a Extraordinaria serán convocadas con 15 días de antelación pola presidenta da Xunta Directiva.

A notificación farase nos locais da asociación para as asembleas ordinarias e no domicilio das asociadas para as asembleas extraordinarias.

Artigo 20°.- Serán competencias da Asemblea Xeral Ordinaria:

1. Aproba-lo plan de actividades.
2. Examinar e aproba-las contas e balances do exercicio anterior.
3. Aproba-los presupostos de ingresos e gastos para cada exercicio.
4. Exame e aprobación das cotas.

Artigo 21°.- Serán competencias da Asemblea Xeral Extraordinaria:

1. Modifica-los estatutos da asociación.
2. Elixir e cesa-los integrantes da Xunta Directiva.
3. Aproba-la federación con outras asociacións.
4. Autoriza-lo alleamento, gravame ou hipoteca de bens sociais.
5. Acorda-la disolución da asociación.
6. Designa-los/as liquidadores/as.
7. Ratifica-la expulsión de asociados e asociadas a proposta da Xunta Directiva.
8. Solicita-la declaración de utilidade pública da asociación.
9. Aproba-lo regulamento de réxime interno da asociación.
10. As que sendo de competencia da asemblea ordinaria, por razóns de urxencia ou necesidade, non poidan agarda-la súa convocatoria, sen grave prexuízo para a asociación.
11. Tódalas non conferidas expresamente á Asemblea Xeral Ordinaria ou a Xunta Directiva.

Artigo 22°. A Asemblea Xeral quedará validamente constituída sempre que concorran a metade máis unha das asociadas na primeira convocatoria ou transcorrida media hora en segunda convocatoria, con calquera número de asistentes, pero, en todo caso, coa presenza da presidenta ou vicepresidenta e a secretaria ou persoa que a substitúa.

Artigo 23°.- Os acordos adoptados deberán ser polo voto afirmativo da maioría simple das asistentes ou representadas, excepto os relativos ós apartados do 1 ó 7 do artigo 21°, que requirirán maioría de dous terzos. A continuación levaráanse os acordos ó libro de actas e asinarao a presidenta, a secretaria da Asemblea. A acta deberá ser lida na seguinte sesión celebrada pola Asemblea Xeral e aprobada pola maioría dos membros presentes.

Artigo 24°.- Os acordos adoptados conforme ós preceptos anteriores obrigarán a tódalas asociadas, incluso ás non asistentes.

As sesións abríranse cando así o determine a presidenta. Seguidamente procederase por parte da secretaria á lectura da acta da asemblea anterior que deberá ser aprobada.

Posteriormente, a secretaria procederá a presentar a orde do día. Cada punto será informado polo membro da Xunta Directiva que lle corresponda, procedéndose ó debate e a aprobación dos correspondentes acordos nos termos contidos nestes estatutos, segundo a materia de que se trate.

Artigo 25°.- Os acordos que vaian contra estes estatutos ou infrinxan os fins da asociación poderán ser recorridos en reposición diante da Asemblea Xeral. A partir da resolución do recurso de reposición, quedará expedita a vía para recorrer perante a xurisdición ordinaria.

Artigo 26°.- 1. A secretaria recibirá e tramitará as solicitudes de ingreso, levará o ficheiro e o libro rexistro de asociados e terá ó seu cargo a dirección dos traballos administrativos da entidade. Correspóndelle, así mesmo, notificar as convocatorias, custodiar as actas e expedir certificacións destas co visto e prace da presidenta. A secretaria tamén levará o inventario dos bens da asociación nun libro establecido para este efecto.

2. Nos casos de ausencia, vacante ou enfermidade da secretaria, a presidenta designará entre as vocais a unha que desenvolva esta función.

Artigo 27°.- 1. A Tesoureira recadará e custodiará os fondos pertencentes á asociación, dará cumprimento ás ordes de pagamento que expida a presidenta, levará a contabilidade da asociación, tomará razón e levará conta dos ingresos e dos gastos asociativos, elaborará o borrador de orzamentos da asociación así como as contas de resultados e balances.

2. A tesoureira ten a obriga de proceder ó peche do exercicio orzamentario antes do 15 de decembro, co fin de que as contas estean a disposición dos membros da asociación nos quince días anteriores á celebración da asemblea ordinaria.

Artigo 28°.- As vocais terán as seguintes atribucións:

1. Realizar programas e propostas na súa área de actuación.
2. Desempeña-los traballos que lle sexan encomendados pola Xunta Directiva.

CAPÍTULO IV RÉXIME ECONÓMICO

Artigo 29º.- A asociación no momento de iniciar as súas actividades dispón dun patrimonio de 0 euros. O peche do exercicio económico coincidirá co do ano natural.

Artigo 30º.- A asociación funcionará en réxime de presuposto anual, con partidas diferenciadas de ingresos e gastos. O borrador de presuposto será elaborado pola tesoureira da asociación, que deberá telo preparado antes do un de xaneiro de cada ano, a fin de que poida ser aprobado na Asemblea Xeral Ordinaria.

Artigo 31º.- A asociación mantérase dos seguintes recursos:

1. As cotas periódicas das asociadas.
2. As cotas extraordinarias que propoña a Xunta Directiva e sexan aprobadas pola asemblea.
3. As doazóns ou subvencións que poidan conceder órganos públicos, entidades privadas ou particulares.
4. Os ingresos que se poidan recibir polo desenvolvemento das actividades da asociación.
5. Calquera outro ingreso admitido pola normativa vixente para actividades non lucrativas.

Artigo 32º.- A Asemblea Xeral Ordinaria, a proposta da Xunta Directiva, aprobará tanto as cotas ordinarias como as extraordinarias que non serán reintegrables en ningún caso. O recadado dedicarase a atender as necesidades da asociación.

Artigo 33º.- Anualmente, con referencia ó último día do exercicio económico de cada ano, elaboraranse as contas, que se formalizarán nunha memoria, que será posta a disposición das asociadas, durante un prazo non inferior a 15 días ó sinalado para a celebración da Asemblea Xeral Ordinaria, que deberá aprobalas ou censuralas.

Artigo 34º.- Para a disposición de fondos das contas que a asociación ten nas entidades bancarias será necesaria a sinatura conxunta da presidente e da tesoureira

Artigo 35°.- Como entidade sen ánimo de lucro, en ningún caso poderán ser distribuídos entre as asociadas os recursos obtidos pola asociación.

CAPÍTULO V DO REGULAMENTO DE RÉXIME INTERNO

Artigo 36°.- O regulamento de réxime interno, no seu caso, desenvolverá aquelas materias non contempladas directamente nestes estatutos, como o procedemento de elección dos membros da Xunta Directiva e o procedemento disciplinario, e non pode ir en ningún caso en contra do estipulado neles. En todo caso, o funcionamento interno da asociación estará sometido ó ordenamento xurisdiccional civil.

CAPÍTULO VI MODIFICACIÓN DE ESTATUTOS E DISOLUCIÓN DA ASOCIACIÓN

Artigo 37°.- Os ditos estatutos só poderán ser modificados por acordo da Asemblea Xeral Extraordinaria convocada para tal efecto, adoptado polas 2/3 partes dos asociados. A proposta de convocatoria deberá ir acompañada do texto das modificacións propostas.

Artigo 38°.- A asociación disolvérase voluntariamente por acordo das asociadas adoptado polas 2/3 partes das asistentes á Asemblea Xeral Extraordinaria convocada para tal efecto.

Artigo 39°.- Acordada a disolución, a Asemblea Xeral Extraordinaria designará .res asociadas liquidadoras, que xunto a presidente e a tesoureira, procederán para efectuar a liquidación dos bens, pagando débedas, cobrando créditos e fixando o haber líquido resultante.

Artigo 40°.- O haber resultante, unha vez efectuada a liquidación, doárase a outra asociación non lucrativa e inscrita na comunidade autónoma que teña iguais ou similares fins que os desta asociación.

O xustificante da doazón será presentado no Rexistro de Asociacións correspondente para proceder á inscrición da disolución da asociación.

VISADO:

Quedan visados os presentes estatutos de la **ASOCIACIÓN OBSERVATORIO DA MARIÑA POLA IGUALDADE**, correspondéndolle o número **10384** da sección 1ª, do Rexistro Provincial de Asociacións desta delegación, consonte co establecido na Lei Orgánica 1/2002, do 22 de marzo.

Lugo, 20 de marzo de 2007

Artigo 40.º - O haber resultante, unha vez cumprada a liquidación, doarse á outra asociación non lucrativa e inscrita na comunidade autónoma que teña iguais ou similares fins que as desta asociación.
O xustificante da donación será presentado no Rexistro de Asociacións correspondente para proceder á inscrición da asociación.